

**FRAMKVÆMDARÁKVÖRÐUN FRAMKVÆMDASTJÓRNARINNAR
(ESB) 2021/1895****2022/EES/18/56****frá 28. október 2021**

um að koma á jafngildi COVID-19-vottorða sem gefin eru út í Sameinaða konungsríkinu Stóra-Bretlandi og Norður-Írlandi og vottorða sem gefin eru út í samræmi við reglugerð Evrópuþingsins og ráðsins (ESB) 2021/953, til þess að greiða fyrir réttinum til frjálsrar farar innan Sambandsins (*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð Evrópuþingsins og ráðsins (ESB) 2021/953 frá 14. júní 2021 um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (stafrænt ESB-vottorð vegna COVID) til að auðvelda frjálsa för á meðan COVID-19-heimsfaraldurinn stendur yfir ⁽¹⁾, einkum 2. mgr. 8. gr.,

og að teknu tilliti til eftirfarandi:

- 1) Í reglugerð (ESB) 2021/953 er mælt fyrir um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (hér á eftir nefnt „stafrænt ESB-vottorð vegna COVID“) í því skyni að auðvelda handhöfum þeirra að nýta sér rétt sinn til frjálsrar farar á meðan COVID-19-heimsfaraldurinn stendur yfir. Hún á einnig að stuðla að því að auðvelda afléttingu í áföngum á takmörkunum á frjálsri för, sem aðildarríkin hafa sett í samræmi við lög Sambandsins til að hefta útbreiðslu SARS-CoV-2, með samræmdum hætti.
- 2) Reglugerð (ESB) 2021/953 heimilar viðurkenningu COVID-19-vottorða sem þriðju lönd gefa út til handa borgurum Sambandsins og aðstandendum þeirra ef framkvæmdastjórnin kemst að þeirri niðurstöðu að umrædd COVID-19-vottorð séu gefin út í samræmi við staðla sem jafngilda þeim sem komið er á fót samkvæmt þeirri reglugerð. Enn fremur eiga aðildarríkin, í samræmi við reglugerð Evrópuþingsins og ráðsins (ESB) 2021/954 ⁽²⁾, að beita þeim reglum sem mælt er fyrir um í reglugerð (ESB) 2021/953 gagnvart ríkisborgurum þriðju landa sem falla ekki undir gildissvið þeirrar reglugerðar en dvelja eða eru búsettir löglega á yfirráðasvæði þeirra og hafa rétt til að ferðast til annarra aðildarríkja í samræmi við lög Sambandsins. Af þeim sökum ættu sérhverjar niðurstöður um jafngildi í þessari ákvörðun að eiga við um COVID-19-vottorð um bólusetningu, próf og bata sem gefin eru út í Sameinaða konungsríkinu Stóra-Bretlandi og Norður-Írlandi til handa ríkisborgurum Sambandsins og aðstandendum þeirra. Á sama hátt ættu slíkar niðurstöður um jafngildi einnig, á grundvelli reglugerðar (ESB) 2021/954, að eiga við um COVID-19-vottorð um bólusetningu, próf og bata sem gefin eru út í Sameinaða konungsríkinu Stóra-Bretlandi og Norður-Írlandi til handa ríkisborgurum þriðju landa sem dvelja eða búa löglega á yfirráðasvæði aðildarríkjanna með þeim skilyrðum sem mælt er fyrir um í þeirri reglugerð.
- 3) Hinn 28. júlí 2021 lét Sameinaða konungsríkið Stóra-Bretland og Norður-Írland framkvæmdastjórninni í té ítarlegar upplýsingar um útgáfu samvirkandi COVID-19-vottorða um bólusetningu, próf og bata innan sameiginlegs kerfis sem ber heitið „Bresk COVID-vottorð“ (UK COVID Certificates). Þetta kerfi samanstendur af fjórum þáttum fyrir England, Wales og Mön; Jersey og Guernsey; Skotland og Norður-Írland, sem bera heitin „Covid Pass“, „2D Barcode API“, „NHS Scotland Covid Status“ og „COVIDCert“, í þessari röð. Sameinaða konungsríkið Stóra-Bretland og Norður-Írland upplýsti framkvæmdastjórnina um að það líti svo á að COVID-19-vottorð þess séu gefin út í samræmi við staðal og tæknikerfi sem eru samvirkandi við traustrammann sem komið er á fót með reglugerð (ESB) 2021/953 og

(*) Þessi ESB-gerð birtist í Stjttíð. ESB L 384, 29.10.2021, bls. 112. Hennar var getið í ákvörðun sameiginlegu EES-nefndarinnar nr. 380/2021 frá 10. Desember 2021 um breytingu á V. viðauka (Frelsi launþega til flutninga) og VIII. viðauki (Staðfesturéttur) við EES-samninginn (bíður birtingar).

⁽¹⁾ Stjttíð. ESB L 211, 15.6.2021, bls. 1.

⁽²⁾ Reglugerð Evrópuþingsins og ráðsins (ESB) 2021/954 frá 14. júní 2021 um ramma um útgáfu, sannprófun og viðurkenningu samvirkandi COVID-19-vottorða um bólusetningu, próf og bata (stafrænt ESB-vottorð vegna COVID) vegna ríkisborgara þriðju landa sem dvelja eða búa löglega á yfirráðasvæðum aðildarríkjanna á meðan COVID-19-heimsfaraldurinn stendur yfir (Stjttíð. ESB L 211, 15.6.2021, bls. 24).

gera kleift að sannprófa ósvikni, gildi og heilleika vottorðanna. Sameinaða konungsríkið Stóra-Bretland og Norður-Írland hefur í þessu tilliti upplýst framkvæmdastjórnina um að COVID-19-vottorð, sem Sameinaða konungsríkið Stóra-Bretland og Norður-Írland hefur gefið út í samræmi við kerfið sem ber heitið „Bresk COVID-vottorð“, innihaldi þau gögn sem fram koma í viðaukanum við reglugerð (ESB) 2021/953.

- 4) Sameinaða konungsríkið Stóra-Bretland og Norður-Írland upplýsti framkvæmdastjórnina einnig um að það viðurkenni bólusetningavottorð sem aðildarríkin og EES-löndin gefa út í samræmi við reglugerð (ESB) 2021/953. Auk þessa upplýsti Sameinaða konungsríkið Stóra-Bretland og Norður-Írland framkvæmdastjórnina um að það muni meðhöndla handhafa stafrænna ESB-vottorða vegna Covid um bólusetningu, bata og próf eins og handhafa vottorða sem gefin eru út í Sameinaða konungsríkinu Stóra-Bretlandi og Norður-Írlandi. Sameinaða konungsríkið Stóra-Bretland og Norður-Írland benti á að allir ferðamenn sem eru að fullu bólusettir með bóluefni sem viðurkennt er í Bretlandi eða bóluefni sem fengið hefur leyfi innan alls Evrópusambandsins eru undanþegnir sóttkví og frá því að fara í próf á 8. degi ef þeir koma frá löndum sem eru flokkuð með kóðanum „appelsínugult“ samkvæmt faraldsfræðilegri stöðu þeirra. Sameinaða konungsríkið Stóra-Bretland og Norður-Írland tilgreindi einnig að neikvæð próf og náttúrulegt ónæmi í kjölfar jákvæðs prófs væru ekki hluti af stefnu þess varðandi undanþágu fólks frá sóttkví.
- 5) Hinn 4. október 2021 lét framkvæmdastjórnin, í kjölfar beiðni frá Sameinaða konungsríkinu Stóra-Bretlandi og Norður-Írlandi, gera tæknipróf sem sýndu fram á að COVID-19-vottorðin um bólusetningu, próf og bata eru gefin út af Sameinaða konungsríkinu Stóra-Bretlandi og Norður-Írlandi í samræmi við kerfið sem ber heitið „Bresk COVID-vottorð“, að hver þeirra þátta er samvirkandi við traustmann sem komið er á fót með reglugerð (ESB) 2021/953 og gerir kleift að sannprófa ósvikni, gildi og heilleika vottorðanna. Framkvæmdastjórnin staðfesti einnig að COVID-19-vottorðin um bólusetningu, próf og bata, sem Sameinaða konungsríkið Stóra-Bretland og Norður-Írland hefur gefið út í samræmi við hvern þátt kerfisins sem ber heitið „Bresk COVID-vottorð“, innihaldi nauðsynleg gögn. Mat framkvæmdastjórnarinnar er staðfest í kjölfar viðbótartilkynningar sem Sameinaða konungsríkið Stóra-Bretland og Norður-Írland lagði fram 14. október 2021.
- 6) Auk þessa upplýsti Sameinaða konungsríkið Stóra-Bretland og Norður-Írland framkvæmdastjórnina um að það gefi út samvirkandi bólusetningavottorð fyrir COVID-19-bóluefni. Þessi bóluefni eru nú Comirnaty, Covid-19-bóluefnið Janssen, Spikevax og Vaxzevria. Sameinaða konungsríkið Stóra-Bretland og Norður-Írland benti enn fremur á að það gefi út bólusetningavottorð fyrir möguleg bóluefni í klínískum prófunum til handa þeim þátttakendum í prófununum sem fengið hafa mögulegu bóluefnin. Þetta á sem stendur við um mögulegt bóluefni þróað af Novavax CZ AS.
- 7) Sameinaða konungsríkið Stóra-Bretland og Norður-Írland upplýsti framkvæmdastjórnina einnig um að það muni eingöngu gefa út samvirkandi prófvottorð fyrir kjarnsýrumögnunarpróf en ekki fyrir skyndipróf.
- 8) Enn fremur upplýsti Sameinaða konungsríkið Stóra-Bretland og Norður-Írland framkvæmdastjórnina um að það gefi út samvirkandi vottorð um bata. Þessi vottorð gilda í allt að 180 daga frá fyrstu jákvæðu prófniðurstöðu.
- 9) Enn fremur upplýsti Sameinaða konungsríkið Stóra-Bretland og Norður-Írland framkvæmdastjórnina um að þegar sannprófundur í Sameinaða konungsríkinu Stóra-Bretlandi og Norður-Írlandi sannprófa vottorð verði persónuupplýsingar, sem fram koma í þeim, aðeins unnar til að sannprófa og staðfesta bólusetningu, prófniðurstöðu eða bata handhafa og verði ekki geymdar eftir það.
- 10) Þannig eru til staðar nauðsynlegir þættir til að ákveða að líta skuli á COVID-19-vottorð, sem eru gefin út í Sameinaða konungsríkinu Stóra-Bretlandi og Norður-Írlandi í samræmi við kerfið sem ber heitið „Bresk COVID-vottorð“, sem jafngild þeim sem gefin eru út í samræmi við reglugerð (ESB) 2021/953.
- 11) Því ætti að viðurkenna COVID-19-vottorð sem gefin eru út af Sameinaða konungsríkinu Stóra-Bretlandi og Norður-Írlandi í samræmi við kerfið sem ber heitið „Bresk COVID-vottorð“ með þeim skilyrðum sem um getur í 5. gr. (5. mgr.), 6. gr. (5. mgr.) og 7. gr. (8. mgr.) reglugerðar (ESB) 2021/953.

- 12) Til að þessi ákvörðun öðlist gildi ætti að tengja Sameinaða konungsríkið Stóra-Bretland og Norður-Írland við traustramma stafræna ESB-vottorðsins vegna COVID sem komið er á fót með reglugerð (ESB) 2021/953.
- 13) Til að vernda hagsmuni Sambandsins, einkum á sviði lýðheilsu, er framkvæmdastjórninni heimilt að beita heimildum sínum til að fella þessa ákvörðun tímabundið eða varanlega úr gildi ef skilyrði 2. mgr. 8. gr. reglugerðar (ESB) 2021/953 eru ekki lengur uppfyllt.
- 14) Til að tengja Sameinaða konungsríkið Stóra-Bretland og Norður-Írland við traustramma stafræna ESB-vottorðsins vegna COVID, sem komið er á fót með reglugerð (ESB) 2021/953, eins fljótt og unnt er ætti þessi ákvörðun að öðlast gildi daginn sem hún birtist í *Stjórnartíðindum Evrópusambandsins*.
- 15) Ráðstafanirnar sem kveðið er á um í þessari ákvörðun eru í samræmi við álit nefndarinnar sem komið er á fót með 14. gr. reglugerðar (ESB) 2021/953.

SAMÞYKKT ÁKVÖRÐUN ÞESSA:

1. gr.

Líta skal á COVID-19-vottorð um bólusetningu, próf og bata, sem Sameinaða konungsríkið Stóra-Bretland og Norður-Írland gefur út í samræmi við kerfið sem ber heitið „Bresk COVID-vottorð“, sem jafngild þeim sem gefin eru út í samræmi við reglugerð (ESB) 2021/953 til þess að greiða fyrir réttinum til frjálstrar farar innan Sambandsins.

2. gr.

Tengja skal Sameinaða konungsríkið Stóra-Bretland og Norður-Írland við traustramma stafræna ESB-vottorðsins vegna COVID sem komið er á fót með reglugerð (ESB) 2021/953.

3. gr.

Ákvörðun þessi öðlast gildi daginn sem hún birtist í *Stjórnartíðindum Evrópusambandsins*.

Gjört í Brussel 28. október 2021.

Fyrir hönd framkvæmdastjórnarinnar,

Ursula VON DER LEYEN

forseti.